

Date – 18/04/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Lok Sabha member thlang tura naktuka vote thlak turin inbuatsaihna peihfel a ni .**
- 2. Lok Sabha member thlanna vote thlak huna duty tur tam zawk chu vawiin hian an duty na tur hmun an pan ang.**
- 3. Election Commission of India CEC in vote nei te naktuka vote thlak theuh turin a sawm.**

<><><>

CAMPAIGN ENDS

Lok Sabha member thlang tura naktuka vote thlak turin inbuatsaihna peihfel a ni a, political party te campaign theih hun pawh nimin tlai khan khar a ni ta.

Mizoram CEO thuchhuahin a tarlan danin nimin tlai dar 5 atanga vote thlak ni, Zirtawpni tlai dar 5 thleng, darkar 48 chhung chu silence period kalpui tur a ni a. Hemi hun chhung hian TV leh electronic media bakah social media-ah te inthlan kaihhnawih thil tarlan leh tihchhuah khap a ni a. Inthlan kaihhnawiha inkoh khawm leh thusawi khap a nih bakah inthlan kaihhnawiha mipui intihhlamna, enawm leh hlimhlawpna engmah buatsaih phal a ni lo a. Candidate leh political party te'n press conference leh interview an huaihawt phal a ni lo a. Thupek zawm lo te chu kum 2 thleng lungin tan tir emaw, lei chawi tir emaw, a pahniha hrem theih an ni.

Thuchhuahin a tarlan danin silence period chhungin aurinna hman khap a ni a. Mizoram pawn atanga lo kal political party aiawh leh candidate campaign puitute chu silence period a intan hnuah chuan Mizoram parliamentary constituency huamchhungah vote an nei a nih loh chuan Mizoram an chhuahsan tawh tur a ni a. Silence period chhung hian Flying Squad Team, Static Surveillance Team, leh adangten dan bawhchia an awm leh awm loh an fang kual reng dawn a.

Silence period chu mipuiten rilru fim tak leh ngaihtuahna thiang an neih theih nana ruahman a nih thu leh, he hun hi tha taka zawm a nih theih nan

candidate te leh political party te pawh mahni inthunun tura beisei an nih thu Mizoram CEO thuchhuah chuan a tarlang bawh a ni.

Inthlan vote thlakna tur hian Polling Station 1,276 a awm a, inthlan buaipuitu tur, Polling party-te pawh inpeihfel tawh a ni.

Electoral Roll thar berin a tarlan danin Mizoramah vote nei mi 8,56,364 an awm a; heng zinga 4,14,805 hi mipa niin, hmeichhia 4,41,559 an awm a, Service voters 4,963 an awm bawh. Kum 85 chunglam voters awmin PwD voters 3397 an awm a, young voters kum 18-19 mi 36,370 an awm bawh a ni. Tun inthlanpui atana vote nei awm tamna ber chu Aizawl District niin voters 2,88,304 (Mipa - 1,34,838 leh Hmeichhia - 1,53,466) an awm a, vote nei awm tlemna ber District chu Hnahthial District niin voters 16,223 (Mipa - 8008 leh Hmeichhia - 8215) a ni. Polling Station-a elector tamna ber chu Zemabawk-VIII (Aizawl District) niin elector tlemna ber chu Thehlep (Lunglei District) a ni.

(DESK)

<><><>

POLLING PARTIES

Lok Sabha member thlanna vote thlak huna hmun hla zuala duty tur te chuan nimin khan an dutyna tur hmun an pan a, a tam zawk chu vawiin an duty na tur hmun an pang thung ang.

Vawiin hian Polling Station 1108 a duty turte an chhuak anga, vote thlak ni a duty tur Polling Official ruat mi 5,071 an awm a ni.

Nimin khan Lunglei district hnuaiia khaw hla zual leh kalkawng harsa zuala kal tur polling party 13 te chu Pi Ramdiniani, District Election Officer leh bawrsap Lunglei district ni bawh chuan a vai liam a.

Polling party te hu Thorang biala khaw 7 leh West Tuipui biala khaw 6 a kal tur te an ni.

Mamit district chhunga Polling Station 121 zinga polling station hla zual leh lirthei (motor) kal theih lohna polling station 39 a duty turte pawh nimin khan an chhuak tan a.

Mamit district chhungah hian polling station 121 awmin chung zinga polling station 39 te chu hmun hla zual leh kal pawh harsa an ni a, heng polling station 39 zingah hian polling station 4 - Bajirungpa, Kananthar, Zopui leh Chilui te chu ke a kal ngai niin polling station 2 - Dilzawl leh Tlangkhang polling station te chu Lawngleng hmanga kal ngai an ni thung a ni. Sotapa polling station chu lirthei kal theih nimahse ruahsur chuan ke a kal ngai tur a ni thung a ni.

Nimina polling station 39 a duty tur te hi Hachhek bial polling station 9, Dampa bial polling station 20 leh Mamit bial polling station 10 a duty tur polling party te an ni.

Lawngtlai District chhunga polling station 181 zinga Lawngtlai aṅanga hla zual polling station 116-a duty tur polling party-te chuan nimin khan Government Lawngtlai College aṅangin an duty-na tur hmun an pan a. Sector bial ṭhen viltu tur sector magistrate 15 chuan an duty-na tur hmun an pan ve nghal bawk.

Polling Party kal chhuak turte hian Government Lawngtlai College-a Dispatch & Receiving Counter aṅangin inthlan buatsaihna tur hmanrua leh bungruate lam khawmin, strong room aṅangin EVM leh VVPAT an la chhuak a. An bungruate an endik fel vek hnuah an duty-na tur hmun panin an chhuak a. Polling party kal chhuakte hi Lawngtlai District Election Officer Pu Cheemala Siva Gopal Reddy chuan Government Lawngtlai College tual aṅangin a vai liam.

Nimin khan Tuichawng assembly biala polling station 70-a polling party-te chuan an zavaiin an duty-na tur hmun an pan nghal vek a. Lawngtlai West biala polling station 69 awm zinga polling station 32-a polling party-te chuan an duty-na tur hmun panin, Lawngtlai East biala polling station 42 awm zinga polling station 14-a polling party-te chuan an duty-na tur hmun an pan ve bawk a. Tuichawng bial chhunga sector magistrate 11, Lawngtlai West bial chhunga sector magistrate 3 leh Lawngtlai East biala sector magistrate 1 chuan an bial (sector) an pan ve nghal bawk.

Polling Station 1276 zingah hian Thingtlang Polling Station 751 leh Khawpui (Urban) Polling Station 525 a awm a, Polling Station hi hmun hrang hrang 1166 ah siam a ni a. Chawhrualin Polling Station pakhatah voter 671 zel an awm a, Polling Station 765 ah Polling Booth-a chet vel na te webcasting kal tlanga vil a ni dawn bawk.

Vulnerable Polling Station 14 (Kolasib District - 7, Aizawl District - 3, Champhai District - 4), Critical Polling Station 5 (Saitual District vek), Lirthei luh lohna, ke a pan ngai Polling Station 11 (Mamit District - 6, Lunglei District - 4, Lawngtlai District - 1) leh Lawngleng hmanga pan ngai Polling Station 15 (Lunglei District - 13, Mamit District - 2) a awm bawk.

Model Polling Station hi Mizoram pumah 25 awmin Auxilliary Polling Station hi Lunglei District-ah 4 a awm a, All Women Managed Polling Station (Pink Polling Station) 136, All Youth Managed Polling Station 7 leh PwD Managed Polling Station 1 a awm anga, Vote thlak niah mipui ten nuam tak leh hahdam taka vote an thlak theih nan Assured Minimum Facility (AMF) hmangin hma lak vek a ni bawk.

(PTC's)

<><><>

AYUSH

Mizoram Sorkar Ayush Directorate hnuai National AYUSH Mission chuan an Programme pakhat zing a mi AYUSHGRAM programme hmingin Mizorama AYUSH Health and Wellness Centres 41 zingah Centre 14 thlan bikah inentirna hun a kalpui mek a ni a.

Nimin khan Directorate of AYUSH a hotuten Lawngtlai Dist a Parva – III kalchihin Parva-III Community Hall ah Free clinic te, AYUSH Awareness programme te leh physical and stress management chungchang te kalpui a ni a, damlo mi 184 te hriselna dinhmun an enfiah.

Hetiang hun hi Khawmawi, Thenhlum, Hliappui, Ruantlang leh Vaphai ah te neih chhonzawm leh a ni ang.

AYUSHGRAM Programme hi Theiriati, Thuampui, Chawngte C, Chapi, Noatlah, Paithar, Tuithumhna, Damdep ah te neih tawh bawka, damlo in entir zawnzawngte hnenah damdawi a thlawna sem vek thin a ni.

Parva – III Village Council leh YMA hruaitute chuan lo dawngsawngin, an khaw chungah Free Clinic neih a nih chu an lawm hle tih kan corr an hrih a ni.

(Lalnggheta Ralte Lawngtlai PTC)

<><><>

CEC

Chief Election Commissioner Rajiv Kumar chuan democracy ram India in ram hruaitute thlang tura vote thlak hun a siam chu thil hlu tak leh mawi tak a ni a, he hun a lo thlen leh takah hian vote nei chin ten an hlutna tilangin vote thlak theuh se a tih thu a sawi.

Naktukah vote thlak thawhkhatnaah vote nei te tel vek tura sawmin, kum 2 chhung Election Commission of India in a lo buaipui tawh, tuang tak leh awlsam taka vote thlak anih theih nan official te pawhin ruahmanna hrang hrang an siam a ni a ti.

CEC chuan vote thlak pawimawh zia sawiin, Vote i thlak khan i state aiawhin hruaitu i thlang a ni a, i chhungte leh thenrual tha te pawh sawm chhuakin dan hnuai vote khat power i neih kha hmang tangkai ngei la, thalai zawnzawng te pawhin he hun hlu hi hmang tangkai ngei se a duh tih a sawi a ni.

Lok Sabha inthlan thawh khatna Vote thlak hi state 17 leh union territory 4 huam chungah bial 102-ah neih a ni dawn a.

Mizoram, Arunachal Pradesh, Meghalaya, Nagaland, Sikkim, Andaman leh Nicobar Islands, Lakshadweep, Puducherry, Uttarakhand leh Tamil Nadu- a parliamentary constituency zawnzawng ah inthlanna neih a ni dawn a ni.

Lok Sabha inthlan thawh khatna neih turah hian candidate mi 1625 an awm a ni.

<><><>

VOTE JINGLE

Kan hma lawka Lok Sabha inthlana vote thlak turah hian khua leh tui, vote nei zawnzawngte mahni mawhphurhna a ni tih hriaa vote thlak vek turin kan insawm e.

<><><>